

Daezhwnj sietdiuz, cungj dwg sawj vunz siengj daengz de dwg diemzsisi liengzyauyau, hoeng gou moix baez yawjraen sietdiuz, ndawsim cungj miz cungj raeujrub he nyoenx okdaeuj.

Bi' gvaq sujgyaj, gou youq aen bujsizbanh he hwnjdangz. Ngoenz he banringz, gou bae bujsizbanh haemq caeux, couh caeuq geij boux doengz-hag laeglemx dwkbej. Dou cingq dwk ndaej mizyinx, mbouj rox byawz sawqmwh hemq: "Lauksae daeuj lo!" Doengzhag youq baihrog cungj buet haeuj gyausiz lo, gou hix gipmuengz ngaem ndang bae ra gouh haiz gou duet okdaeuj haenx. "Bung" sing ndeu, aen'gyaeuj gou bungq deng aendaiz lo, caen in ha! Gou yungh fwngz bae lumh, gwnz gyaueuj gingqyienz gawh aen dok he lumj naed duhdoem nei. Gou daenj haiz le doeknaiq dwk byaij bae coh diegnaengh gou, gou siengj cuengqhag ma ranz le baenzlawz caeuq daxmeh gangj, yawjdaeuj noix mbouj ndaej deng daxmeh moeb can he lo.

Lauksae gig vaiq byaij haeuj gyausiz daeuj lo, de yawjraen gou au fwngz goemq aen'gyaeuj, couh cam: "Vuz Cinhenh, aen'gyaeuj mwngz baenzlawz la? Vihmaz cungj goemq



de ya?" Gou gizlawz gamj gangj vahsaed, lauksae caeux couh gangj gvaq mbouj hawj daeuj bujsizbanh caeux lai, vanzlij mbouj hawj youq bujsizbanh dwkbej, danghnaeuz rox caensaed cingzgvang, gou mbouj couh deng bae ha! Siengj daengz neix gou couh yaeuh naeuz: "Haxbaenh hwnj lae seiz mbouj siujsim bungq deng lanzganh aenlae hane." Lauksae daij gwnz gyangdaiz byaij roengzdaeuj, byaij daengz henz ndang gou, dawz gaiqfwngz gou bae, yaengyaeng lumh giz gawh, itmienh lumh itmienh nyaeuq bwnda naeuz: "Gawh baenz hung ha, baenzlawz mbouj siujsim di ha? In mbouj in ha?" Lauksae bingzseiz gig yiemz haenx, seizneix gangjvah gingqyienz dingz ndeu dwg naeuz gou dingz ndeu dwg sim'in. Gou ganjvaiq naeuz: "Mbouj miz gijmaz law, yaep ndeu couh ndei lo."

Lauksae yaek daiq gou bae yawj

canghyw, gou gamjdaengz mbouj youqgaenj genhciz mbouj bae. Lauksae couh daij ndaw cienzbau de dawz maenz ngaenz ndeu okdaeuj, ndenq hawj Cau Vwnzboz naeuz: "Mwngz bae cawx gaiq sietdiuz ndeu ma." Geizgvaq lo, lauksae cawx sietdiuz ma guh gijmaz? Nanzdauh dwg siengj gwn? Siengj mbouj daengz lauksae lumj gou nei ngah gwn. Gou youq ndawsim caeg riu. Gig vaiq Cau Vwnzboz cawx sietdiuz ma lo. Lauksae cieq gvaq sietdiuz byaij coh gou, daengz henz ndang gou le dawz sietdiuz cuengq youq giz gawh aen-gyaeuj gou, doiq gou naeuz: "Fwngz swix fuz youq, gaej hawj de doek roengzdaeuj." Giz gawh haxbaenh lij insep haenx, sawqmwh bienq liengz lo, cwxcaih haujlai.

Dangz goq he gig vaiq couh gvaqbae lo, roengzdangz le, gou roxnyinh giz gawh gwnz gyaueuj mbouj



in geijlai lo. Gou youh ra aengingq daeuj yawj, naed gawh hix siu bae lo, cij dwg lij miz di nding lo.

Lauksae caen coengmingz ha, cij yungh diuz sietdiuz he couh gaijgez aendok gwnz gyaueuj gou, doengzseiz hix gaijgez aendok ndawsim gou—mbouj yungh heiq ma ranz deng moeb lo! Mbouj dwg bw, lauksae mbouj dandan coengmingz, lij miz aensim gyaez hagseng he. Daij seizhaenx hwnj, "lauksae" song cih saw neix bienq ndaej caeuq vunz ndaw ranz yienghneix caenciet lo.

(roek nienzgaep Vuz Cinhenh)



Doengzhag Gou Ciz Yijgyah

我的同学徐雨佳

Doengzhag gou Ciz Yijgyah, de dwg dah niq gyaundeij gyaez seuq simvuen ndeu, de dwg doengzhag cei ndei gou, gou caeuq de dwg ranznden doxgek mbouj gya haenx, song boux dou doengz youq aen youwzyenz ndeu doegsaw, youh youq doengz aen vujdau zozyau doengz aen ban ndeu hag diuqfoux, lij gingciengz youq doxcaez guhcaemz byaujyenj, seizneix youh doengz youq aen siujyoz ndeu doegsaw, ndaej yienghneix gangj, song boux dou lumj bouxvunz caeuq duzngaeuz nei mbouj faen hai, ngoenz ndeu mbouj raen, lumj gek haujlai nanz mbouj raen nei.

Ciz Yijgyah aen coh neix geijlai ndei dingq ha! De saundeij, andingh, miz siuhyangj, rox lijmau, lauksaed souj-saenq youh haengj bang vunz. Gou cei gyaez dingq de ciengqgo byaujyenj, sing de sep youh ndei dingq, diuqfoux dungcoz ndei yawj. Moix baez byaujyenj cungj ndaej gyoengq vunzyawj haenx bekwngz haenhndei.

Ciz Yijgyah dwg boux hagseng hagsib binjgwz cungj gig ndei ndeu, gou vih gou miz boux doengzhag ndei neix sim'angq.

(ngeih nienzgaep)

Maqmuengh Gvansim

渴望关怀

Haemhneix gou daej lo, dwg vih daxmeh dwk mazcoz daej.

Gwn gvaq haeuxcaeuz, gou vih ngoenzcog gauj Yinghiy cingq fuzsiz dwk, seizhaenx gyoengq-vunz Saujgim ndaw mbanj youh ra daxmeh gou "caep Cangzcwnz" lo. Sing "bibi baba" cauz dwk gou simnyap dangqmaz. Yienghneix gou byaij gvaqbae doiq daxmeh naeuz: "Meh, ngoenzcog gou yaek gauj Yinghiy, seizneix gou cingq fuzsiz ne, mwngz couh gaej dwk lo!" Daxmeh raemh aennaj naeuz: "Lwngyez gaej guenj saeh boux-hung!" Saujgim youq henz haenx hix gaen dwk naeuz: "Deuz-deuzdeuz, neix youh mbouj dwg

ranz mwngz, mwngz dah niq neix, ceizcaeux yaek haq bae ranz bouxwnq……" Daxmeh laebdaeb caeuq gyoengqde dwk mazcoz.

Gou yawj dwk, dingq dwk, siengj dwk, aenndaeng baez manh, raemxda lumj roixcaw mae goenq nei mboujdingz doek roengzdaeuj…… Daxmeh ha daxmeh, mwngz seizlawz cij ndaej lai di gvansim gou ciuqgoq gou? Nanzdauh mwngz bingzseiz lai cawx di buhvaq gyaundeij hawj gou, lai cawx di gijwn ndei gwn hawj gou couh suenq gvansim luha? Mbouj dwg bw! Mwngz hawj gou gij gwndaenq "ndei" neix mbouj dwg gou siengj au ha. Gou

maqmuengh ndaej daengz haenx mbouj dwg gijneix, dwg mwngz caencingq gvansim gou gyaez gou ha!

Gou ngaem gyaueuj byaij ma ndaw rug gou, naengh youq naj daiz dinghdinh cimyawj fuk veh venj youq gwnz ciengz haenx: Dax meh he cingq dawz cazbingj daeuj hawj dahlwg de cingq hagsib haenx. Gij raemxda saepndaengq cij rox gij simcingz seizneix gou ha.

(haj nienzgaep Gvanh Cujginh)



Duzgaeq Caeuq Duzdouq Ndaeij Caemh Roengq Lwi?

鸡兔能同笼吗?



Daxbuz gyaez ciengx gaeq, gou gyaez ciengx douq. Hoeng daxmeh naeuz ndaw ranz cij ndaej cuengq aen roengq ndeu, gou daezyiq au gaeq caeuq douq cuengq aen roengq ndeu ciengx.

Daxmeh ciq daez daezok: "Gangj daengz gaeq douq caemh roengq, gou miz aen vwndiz ndeu gaujgauj mwngz."

Aen roengq ndeu coux miz duzgaeq caeuq duzdouq, itgunh miz 11 aen gyaueuj, 30 gaiq ga, duzgaeq caeuq duzdouq gak miz geijlai duz?

Gou suenq le baez youh baez, gip dwk gou nyauj rwz gau gyaueuj. Doeklaeng daxmeh gangj gij suenqfap hawj gou.

Gyajsiet cungj dwg duzdouq,

couh dwg $4 \times 11 = 44$ (gaiq) ga, hoeng saedsaeh cijmiz 30 gaiq ga, lai le $44 - 30 = 14$ (gaiq) ga. Aenvih moix duz gaeq beij duzdouq noix 2 gaiq ga, raeuz au 14 gaiq ga neix bae cawz 2, $14 \div 2 = 7$, yienghneix gaeq miz 7 duz, $11 - 7 = 4$, doq cijmiz 4 duz.

Gou niemhsuenq baez ndeu, ndaejsoq dwg deng lo. Hoeng gou cei gvansim haenx dwg: Duzgaeq caeuq duzdouq ndaej caemh roengq ciengx lwi?

(ngeih nienzgaep Dunglej Cezhih)